

# Powšitkowne WOZJEWJENJA

njedźelu, 6. měrca 2022

## Wusyłanje Božemu mšow

Serbskorěčnej Božej mši móža wěriwi tutu njedźelu, 6. měrca, znova jako livestream w interneće scěhować. Jedne kemše přenjesu so we 8.30 hodź. z Kulowskeje, dalše w 9 hodź. z Chróšćanskeje cyrkwe. Linkaj na nej stej w interneće pod [www.posol.de](http://www.posol.de) a na wosadnymaj stronmaj podatej.

## Ekumeniski póstny seminar w Smochćicach

„Zhromadnje swět wuchować“ rěka hesło lětušeho přenjeho ekumeniskeho póstneho seminara póndźelu, 7. měrca, w 19.30 hodź. w Smochčanskim kubłanišću swjateho Bena. Referentaj staj dr. Gerd Lippold, statny sekretar w saksim ministerstwje za energiju, škit klimy, wobswět a ratarstwo, a Thomas Hörtinger, prokurist firmy LEAG w Choćebuzu. Seminar pokročuje póndźelu, 14. měrca, z přednoškom pod heslom „Zhromadnje cyrkej we wsy wostać“. Hoscej budžetaj potom něhdyša wjesnjanostka Zemic-Tumic Gisela Pallas a Njebjelčanski wjesnjanosta Tomaš Čornak.

## Hromadza dary za čekańcow

Worklečanske dekanatne dušepastyrstwo za dźěci a młodžinu hromadzi za ukrajskich čekańcow, kotřiž do Pólskeje přichadžeja, mjez druhim přikrywy a hygieniske artikle, ale žanu drastu. Dary přijimuju wutoru a srjedu, 8. a 9. měrca, wot 17 do 19 hodź. na starej šuli we Wotrowje, Hrodzišćowa 1. Zamołwići wo to proša, zo bychy ludžo swoje dary we wočinjenych kartonkach abo měchach přiwjezli, tak zo hodža so tam hnydom sortěrować. Link k stronje z wjace informacijemi kaž tež lisćinu z trěbnymi darami je pod [www.posol.de](http://www.posol.de) wozjewjeny.

## TCM hromadzi pjenjezy k podpěranju ukrajskich čekańcow

Towarstwo Cyrila a Metoda z.t. (TCM) hromadzi ze swojej akciju „Łužica pomha“ pjenježne dary za ukrajskich čekańcow, kotřiž přińdu do Pólskeje. „Smy zhonili, zo wostanje wjetšina z nich blisko swojeho kraja, dokelž so bórzomneho nawróta nadžijeja. Naš dołholětny partner, prelat dr. Dariusz Kruczyński, direktor Carity w Ełku na Mazurach, je nam rjekł, zo pomhaja jim tuchwilu najbóle pjenježne dary. Trěbne twory za čekańcow móža sej tam kupić. Smy so tuž dorozumili, zo přewostajimy dary Cariće w Ełku. Ručež pak bychy čekańcy do serbskich wosadow přišli, bychmy džěl darjenych pjenjow za nich nałožili“, rjekny předsyda TCM Jurij Špitank. Štóz chcył na tele wašnje wot wójny domapytanu ludnosć podpěrać, njech přepoka za pjenjezy na konto TCM: Cyrill-Methodius-Verein e.V., IBAN: DE 65 750 90 300 000 828 23 66, hesło: „Ukraina“. Štóz sej darowansku kwitowanku přeje, měł swoju adresu podać.

„Prošu zdomom, zo by kóždy sprawnje pruwował, hač by jednotliwych čekańcow pola sebje přiwzać móhl. Podpěramy wotpowědnu namołwu biskopstwa“, doda předsyda TCM.

## **Modlenje w Róžeńće**

Na modlersku hodžinu před wustajenym Najswjećišim su wěriwi sobotu, 12. měrca, we 18.00 hodž. do Róžeńčanskeje hnadowneje cyrkwy přeprošeni. Paćerje spěwać budu so serbsce a němsce.

## **Serbske kemše w Drježdžanach**

Drježdžanscy Serbja su na maćernorěčnu Božu mšu tutu njedźelu, 6. měrca, w 16 hodž. přeprošeni. Wona wotměje pak so tónraz w cyrkwi Jězusoweje wutroby w Drježdžanach, Borsbergowa 15/17. Hač do jutrow přewodža tamnišu wosadu křižowy puć serbskeje wuměłče Isy Bryccyneje. Do a po kemšach wobsteji móžnosć, sej jón wobhladać a so při někotrych stacijach pomodlić. Tež dalši Serbja z Łužicy su witani. Aktualne postajenja pandemije maja so wobkedźbować.

## **Putnikowanje swójbow**

Lětuše putnikowanje swójbow do Róžanta wotměje so pjatu póstnu njedźelu, 3. apryla. Boža mša w hnadownej cyrkwi zahaji so w 9.00 hodž.

## **Přinoški k póstnemu časej**

Na internetowej stronje [www.swjate-pismo.de](http://www.swjate-pismo.de) nańdu zajimcy rozmyslowanja ke kóždej póstnej njedźeli. Při tym jedna so wo přinoški zaštych lět.

## **Jězba w lěću za šulerjow 5. do 8. lětnika**

Dekanatne dušepastyrstwo džěci přeprošuje šulerjow 5. do 8. lětnika w lětnich prózd-  
ninach na jězbu do Lückendorfa w Žitawskich horach. Wona wotměje so wot pónđzele  
do pjatka, 15. do 19. awgusta. Přizjewjenja přijimuja hač do soboty, 30. apryla, online.  
Link je pod [www.posol.de](http://www.posol.de) podaty.